

Pa evita cu ta duna permisonan pa esablece pa loco.

Departamentonan di Labor, Asuntonan Economico y Husticia mester traha mas estrecho cu otro

ORANJESTAD(AAN) -- Minister di Labor, sra. Mary Wever, ta haya cu departamentonan di Minister di Asuntonan Economico, Minister di Husticia y su ministerio mester traha mas estrecho pa evita cu ta duna permisonan pa companianan establece pa loco na Aruba caminda mas bien ta duna extranheronan trabao y no yiu nan di tera.

Ayeramainta den oficina di Minister sra. Mary Wever, diferente medio di comunicacion a haci e mandatario preguntanan. Mayoria di e

preguntanan tabata riba e asunto di Don Carlos cu antes tabata Mama Mia.

Minister Wever a bisa cu no ta asina cu tin problema entre e y Minister di Husticia riba dunamento di permiso na Don Carlos. E mandatario a desmenti e rumor nan cu ta circula cu Don Carlos ta di e mesun doño di Mama Mia. El a splica cu despues cu Mama Mia a cera, e socio di Ferrara a bay riba su mes y a habri Don Carlos. Esaki ta nifica cu Don Carlos tin otro doño y no manera rumor nan ta circula cu ta Fer-

rara mes a bolbe habri e restaurant.

El a sigui bisa cu den luna di December ora cu e negoshinan di famia Ferrara a cera, e trahadornan a bay cerca dje pa pidi ayudo ya cu nan a keda sin entrada.

Minister Wever a yama Bennett pa mira si den tur e peticionnan pa trahadornan extranhero cu tin por laga e trahadornan aki ocupa e puestonan pa asina nan tin un trabao. A registra tur e trahadornan cu a kita for di Mama Mia pa nan por haya un trabao.

Diripiente a tende cu Don Carlos a habri pero nan no a haci ningun peticion na Direccion di Labor pa trahador. Minister Wever a pidi Bennett si e por haci un investigacion pa mira kendenan ta trahando na Don Carlos y si nan tin e permisonan necesario. A resulta cu e doño no tabatin un permiso pa establece y tampoco e trahadornan a haci peticion na Direccion di Labor. Ta asina cu via di e abogado di Don

Carlos a haya permiso pa sigui traha.

A sigui investiga y a resulta cu abogado di Don Carlos a haya cooperacion di Minister Vos kende a haci posibel cu e trahadornan extranhero cu tabata traha na Mama Mia por a bay traha na Don Carlos. Minister Wever a sigui bisa cu ta Minister Vos su ministerio ta dicidi si ta duna permiso di estadia y di traha. Loke Minister di Labor ta haci ta duna conseho na DOOV si enberdad e peticionnan pa trabao di extranhero cu ta drenta si di berdad Aruba mester di nan of no y si no tin Arubiano cu por ocupa e puesto.

E mandatario a sigui bisa cu loke a trece un confusion ta ora cu abogado di Don Carlos a publica den medio di comunicacion kico gobierno kier, tene un restaurant habri of crea cupo di trabao.

Minister Wever a splica cu gobierno kier crea cuponan di trabao pero pa nos Arubianonan.

Ta asina cu el a reuni cu Min-

ister Presidente caminda el a pidi pa tin un cooperacion mas estrecho entre su departamento di Labor, departamento di Asuntonan Economico y departamento di Husticia. Esaki pasobra no por sigui duna permiso pa companianan establece na Aruba si no tin Arubiano pa traha. Ademas e mandatario ta haya cu Minister di Husticia no por sigui duna permiso di traha na extranheronan sin consulta cu Departamento di Labor si realmente tin necesidad pa mas trahador extranhero.

Den e caso di Don Carlos, e trahadornan tabatin permiso caba y Minister Vos a bay di acuerdo pa laga nan cambia di doño di trabao. Minister Wever a bisa cu no tin ningun problema entre su persona y Minister Vos riba e asunto aki.

E ta desea pa e tres ministerionan ariba menciona traha mas estrecho cu otro pa asina fiha reglanan di maneho pa asina por solucionaria problema cu lo por presenta.

Pelicula den cinema ta ilustra seriamente:

Violacion di privacidad di hende y tapmento di telefoon

ORANJESTAD(AAN) Na Aruba tapmento di telefoon di hopi hende a yega di tuma lugar den pasado y actualmente ningun hende na Aruba sa cuanto tapmento di telefoon keto bay ta tumando lugar.

Filenan a ser traha riba cabez di hopi comerciante y hende inocente na Aruba den temporada di Martin Ras y su compinchinan y consecuencia di nan maneho a pone cu awe extradicion ta un hecho bergonzoso na Aruba.

Actualmente tin un pelicula ta hunga den cinema na Aruba, cu ta ilustra hopi di cerca con privacidad di hende por worde viola door di instancianan di seguridad estatal.

Den e pelicula e publico por mira con horroroso cos por bira unavez cu un servicio di inteligencia cumenza bira un monstruo riba su mes y cumenza comete actonan contra ley y bira un estado di poder den un estado legal.

Na Aruba Cargo Zaak y mas caso di trafico di droga tambe tabata casonan cu mas bien a bay den e skina shinishi di ley y di loke tabata permitible y loke no tabata permitible.

Cargo Zaak tabata un caso sushi caminda cu hopi acto ilegal te awe a ser tapa!

Con a para cu privacidad di e ciudadano na Aruba y ki riesgonan grandi e ciudadano na Aruba y tambe na otro paisnan ta core pa cu servicionan di inteligencia cu ta actua contra ley?

Tur hende ta worde conseha pa bay wak e pelicula "Enemy of the State" cu ta muestra e publico di cerca ki sorto di tecnologia ta worde uza awendia pa por sigui bida di un hende 24 ora pa dia.

Casi 95% di loke ta worde muestra den e pelicula ta yega hopi cerca di e realidad amargo di violacion di privacidad y derechonan constitucional di ciudadanonan rond mundo.

Despues di mira e pelicula aki tur hende lo haya sa e balor di nan privacidad y di nan derechonan constitucional y cumenza hala atencion di gobierno pa cu desaroynan straño cu ta andando na Aruba tambe pa basta tempo caba.

E MINISTRO FEMENINO CU WESO DI LOMBA!!

